

Upravni odbor Udruženja internih revizora u Bosni i Hercegovini, priznatog kao IIA u BiH kod IIA Global (u daljem tekstu: IIA u BiH), na sjednici održanoj u Sarajevu dana 19.09.2016. godine donosi

PRAVILNIK O EDUKACIJI I CERTIFIKACIJI OVLAŠTENIH INTERNIH REVIZORA U BOSNI I HERCEGOVINI

I OPŠTE ODREDBE

Član 1.

Ovim pravilnikom propisuje se postupak, uslovi i način edukacije i certifikacije ovlaštenih internih revizora kod IIA u BiH

Ovim pravilnikom propisuju se uslovi, te način sticanja zvanja ovlaštenu interni revizor i postupak obavezne kontinuirane edukacije za ovlaštene interne revizore, kao i uslovi za obnavljanje certifikata za zvanje „ovlaštenu interni revizor“.

II EDUKACIJA INTERNIH REVIZORA

Član 2.

IIA u BiH provodi stručnu edukaciju :

- a) organizaciju Škole za interne revizore s ciljem sticanja zvanja „ovlaštenu interni revizor“
- b) organizaciju obavezne kontinuirane profesionalne edukacije za ovlaštene interne revizore

III ŠKOLA ZA INTERNE REVIZORE – USLOVI ZA PRISTUPANJE I POLAGANJE ISPITA ZA STICANJE ZVANJA „OVLAŠTENI INTERNI REVIZOR“

Član 3.

Pravo pristupanja Školi za interne revizore i sticanju certifikata ovlaštenog internog revizora imaju sve osobe koje zadovoljavaju sljedeće uslove:

1. Visoka stručna sprema (VII stepen) + 3 godine radnog iskustva u struci;, ili

180 ECT + 3 godine radnog iskustva u struci;, ili

240 ECT + 1 godina radnog iskustva u struci;, ili

Ovlaštenu revizor, ili

Magistri ekonomske struke – (oblast : racunovodstvo i revizija) ; ili

Magistri ekonomskih nauka po “starom sistemu obrazovanja” (4+2) (bez polaganja ispita) ili

Doktori nauka; (bez polaganja ispita)

2. izjava o nekažnjavanju (ovjerena kod nadležnog općinskog organa);

3.potpisan kodeks profesionalne etike Udruženja;

4.uplata naknade za učešće u Školi za interne revizore i

5.uplaćena godišnja članarina.

Ukoliko polaznik ne posjeduje minimalno radno iskustvo u trajanju od tri godine, a zadovoljava sve ostale uslove, može pristupiti Školi i polaganju ispita, s tim da certifikat o zvanju stiče nakon ispunjenog uslova u pogledu radnog iskustva.

IV NAKNADA ZA UČEŠĆE U ŠKOLI ZA INTERNE REVIZORE

Član 4.

Visina naknade za učešće u Školi za interne revizore biće određena posebnom odlukom koju će donijeti Upravni odbor Udruženja.

Polaznici su obavezni da, prije početka sudjelovanja u edukaciji uplate puni iznos naknade na račun Udruženja.

Član 5.

Polaznici koji posjeduju zvanje ovlašteni interni revizor, a čiji su certifikati za navedeno zvanje izdati van teritorija Bosne i Hercegovine, dužni su uplatiti 50% od ukupnog iznosa naknade iz stava 1. Člana 4, uz obavezno polaganje potrebne razlike.

Polaznici sa zvanjem ovlaštenog revizora dužni su uplatiti 40% od ukupnog iznosa naknade iz stava 1. Člana 4.

Polaznici sa titulom ovlašteni interni revizor dužni su uplatiti 25% od ukupnog iznosa naknade, ukoliko žele specijalizaciju iz druge oblasti.

Polaznici sa zvanjem magistra iz oblasti finansija, računovodstva i revizije mogu bez polaganja ispita uplatiti 50% iznosa naknade iz stava 1. Člana 4 i tako steći zvanje ovlaštenog internog revizora iz oblasti koja je predmet njihove specijalizacije.

Polaznici sa titulom doktora nauka iz oblasti poslovne ekonomije mogu bez polaganja ispita uplatiti 33% iznosa naknade iz stava 1. Člana 4 i tako steći zvanje ovlaštenog internog revizora iz oblasti koja je predmet njihove specijalizacije.

V USLOVI ZA PRISTUPANJE POLAGANJU ISPITA ZA STICANJE ZVANJA OVLAŠTENI INTERNI REVIZOR I NAČIN POLAGANJA ISPITA

Član 6.

Polaznici koji su uspješno odslušali stručna predavanja u okviru Škole za interne revizore imaju pravo da pristupe polaganju stručnog ispita za sticanje zvanja ovlašteni interni revizor.

Izuzetno, Upravni odbor može donijeti odluku o organizaciji polaganja stručnog ispita za sticanje zvanja ovlašteni interni revizor bez prethodno održane obuke.

U tom slučaju, ne važi odluka o visini naknade iz člana 4 stav 1., nego Upravni, donosi posebnu odluku o iznosu naknade pod uslovima iz stava 2 ovog člana.

Član 7.

Ukoliko polaznik posjeduje ranije stečeno zvanje ovlaštenog revizora, omogućit će mu se polaganje samo Specijalističkog dijela ispita za sticanje zvanja ovlašteni interni revizor.

Član 8.

Ukoliko polaznik posjeduje ranije stečeno zvanje ovlašteni interni revizor, a želi steći zvanje ovlaštenog internog revizora i za neku od drugih specijalističkih oblasti, omogućit će mu se polaganje samo Specijalističkog dijela tražene oblasti.

Član 9.

Ispit za sticanje zvanja ovlašteni interni revizor polaže se pismeno pred ispitnom komisijom, koju imenuje Upravni odbor IIA u BiH.

Član 10.

Ispitna komisija sastoji se od predsjednika i najmanje dva člana. Upravni odbor prije početka svakog ciklusa predavanja u okviru Škole za interne revizore imenuje članove Ispitne komisije.

Član 11.

Predsjednikom i članovima Ispitne komisije mogu se imenovati samo osobe koje imaju zvanje magistra ili doktora nauka i odgovarajuće iskustvo iz oblasti koja je predmet ispitivanja.

Član 12.

Programom Škole za interne revizore će se odrediti oblasti iz kojih će se vršiti provjera znanja.

Ispitna komisija je odgovorna za zakonitost provođenja stručnog ispita.

V CERTIFIKAT O STEČENOM ZVANJU OVLAŠTENOG INTERNOG REVIZORA

Član 13.

Nakon položenog stručnog ispita, IIA u BiH dodjeljuje nacionalni certifikat o stečenom zvanju „ovlašteni interni revizor“, po specijalizaciji za koju se opredjelio polaznik.

Da bi ovlašteni interni revizor mogao opravdati aktivan status internog revizora, potrebno je da priloži potvrdu o kontinuiranom stručnom usavršavanju iz člana 15. i da dostavi dokaz o uplaćenju članarini.

Članovi koji se stručno usavršavaju pohađanjem seminara i stručnih skupova, dužni su da dostave potvrdu o prisustvovanju spomenutim seminarima i naučnim skupovima u trajanju od najmanje četrdeset sati godišnje, od čega edukacija od strane IIA u BiH mora biti najmanje 20 sati godišnje.

Članovima koji se bave naučno-istraživačkim radom iz oblasti računovodstva, revizije i kontrole i finansija i koji o tome dostave validan dokaz, navedeni rad priznaće se kao stručno usavršavanje u trajanju od 5 sati KPE.

VI STRUČNO USAVRŠAVANJE ČLANOVA UDRUŽENJA

Član 14.

Svi ovlašteni interni revizori dužni su se kontinuirano usavršavati nakon sticanja certifikata iz stava 1 člana 13, radi unapređenja struke, a u skladu sa odredbama ovog Pravilnika.

Član 15.

O stručnom usavršavanju članova vodiće se posebna evidencija u bazi podataka kod sekretara IIA u BiH.

Član 16.

U svrhu vođenja evidencije o stručnom usavršavanju ovlaštenih internih revizora, svaki ovlašteni interni revizor dužan je sekretaru IIA u BiH dostavljati:

- podatke o objavljenoj knjizi, priručniku ili članku, te o stručnim i naučnim radovima iz oblasti interne revizije, računovodstva, revizije i kontrole i ostalih srodnih oblasti,

- potvrdu o održanom predavanju po pozivu ili aktivnom ili pasivnom sudjelovanju na stručnom ili stručno-naučnom skupu ili seminaru,
- original ili ovjerenu kopiju diplome o stečenom stručnom i/ili naučnom stepenu obrazovanja i
- druge dokaze vezane za aktivnosti usavršavanja i upotpunjavanja znanja iz područja interne revizije i srodnih oblasti.

Član 17.

Ovlašteni interni revizor koji iz opravdanih razloga npr. zbog: bolesti, porodijskog odsustva, rada u inostranstvu, nezaposlenosti i sl. nije bio u mogućnosti kontinuirano u razdoblju od jedne godine obavljati stručno usavršavanje prema odredbama ovog Pravilnika, može Upravnom odboru IIA u BiH podnijeti zahtjev za produženje razdoblja stručnog usavršavanja. Zahtjev mora potkrijepiti valjanim dokazima.

Upravni odbor IIA u BiH će o zahtjevu iz stava 1 ovog člana odlučiti rješenjem.

Ako je zahtjev osnovan, Upravni odbor će odrediti produženje razdoblja stručnog usavršavanja, koje ne može biti duže od godinu dana.

VII PRELAZNE I ZAVRŠNE ODREDBE

Član 18.

Program Škole za interne revizore (prilog 1) sastavni je dio ovog Pravilnika.

Član 19.

Sve izmjene i dopune ovog Pravilnika donosi Upravni odbor Udruženja.

Član 20.

Ovaj Pravilnik stupa na snagu i primjenjuje se danom donošenja. Stupanjem na snagu ovog Pravilnika, prestaje da važi Pravilnik o edukaciji i certifikaciji članova Udruženja internih revizora od 19.04.2007. godine

Sarajevo, 19.09.2016. godine



Predsjednik Upravnog odbora

[Handwritten signature]